

四庫全書

集部

欽定四庫全書

元憲集卷十六

宋 宋庠 撰

頌

乾元節祝聖壽頌

臣聞元聖誕生萬代猶乎旦暮大年垂祉千齡永乎春秋故滎河一清而躋此盛期樞電四照而肇此靈契必淑若而能濟疇虔聳而不興惟皇上帝監觀于下土鋪

照乎俶謫之祥以佑民而樹后於鑠令王顧諟于孫命  
翕受乎龐鴻之祐以承旅而制世覆眦興式逖聽風聲  
自青素更期質文叅變帝皇之符紛綸而膺期紹至天  
人之際精稜而屬象相因莫不肇之以積累之源濟之  
以丕嘉之績用能統一期運保乂函夏福浸羣元者其  
邦昌德羨列辟者其齡永岐周之隆也肇后稷而創業  
迄武王而革命然而典刑丕式十八王而崇冠致治者  
成康之功也炎漢之興也自唐堯之垂裔及高皇而啓

圖然而文教寔盛四百祀之保寧丕業者文景之化也  
惟積基之憑厚能垂統而縣盛故累德逾遠而致治逾逸  
受命甚易而格來甚勤洪惟本朝遠誕于真系皇矣藝  
祖出應于嘉運一戎而基業大定再造而寰瀛底寧憲  
度著明規模洪遠太宗秉籙承樞拓迹開統撫乾維而  
張化肇天厯以在躬東南一乎尉候小大懷其威德真  
宗紹庭闡繹握河紀瑞重規沓矩鼓熙寧之風勤崇垂  
鴻講曠絕之禮一德胥暨羣方率同緝王綱而載張垂

帝典而明備精兆畢應遐源益昌誕毓英主嗣有令緒  
恭惟皇帝陛下躬天挺之姿盛燁涌之德重華叶于帝  
則下武配乎王京據五精之題開階有立御二氣之辨  
乘策無繁高拱而視乎治平垂精而宅乎丕顯豐矩彌  
茂庶績越熙若夫沕滴流祉神靈告期里社載鳴渚虹有  
煥鍾堯門之異稟軼稷菴之前徽岐嶷而德受于天覃  
訏而聲載于路銅律御戶導揚于叶氣銀題署宮付畀  
于景數降育之祥也生而靖淵長而敦敏舜瞳鑒物是謂

文明漢準膺符多乎奇異儼珠庭而凝粹懷玉斗以效靈  
足履已而手握袞聲為律而身為度體貌之殊也茅社  
始建雍睦必聞桂坊亟升溫文允著姐絕登鮑肆開洊  
雷一有元良正邦之望洽能鎮大事形國之功著納麓  
歸運承宗主鬯繼聖之業也虔顧天厯入登帝宸間往  
長信之朝思齋太任之德尊為天子有懷于孝恭禮同  
家人無懈于省視瞻三后之暉烈懷四時之永思凱風  
寒泉增孺慕之延感履霜濡露念先靈而載惕至德有

立羣倫斯厚高世之行也淵然臨朝靖恭守位既疏明而暨遠靡矜奮以自賢豁然度量而除其侮慢慎乃號令而盡乎溫雅忠深威懷豪英畢力絕去小察時罕書馬之憂容受直辭人無批鱗之懼君人之量也寵接師傅講求盛典申命儒臣遞侍清燕以天縱聖能之識勵日就緝熙之學古今之才一石總製清衷衡石之書百斤率歸宏覽粉澤六藝鼓吹羣經若稽古以聰明茂對時而化育柏梁之遊間流藻詠太液之唱庸作永歌雲漢

之章昭回河洛之書開典至若取倣奎之像運錯寶之  
跗鑪烟裊清商滴貯潔默運宸思奮為竒蹤金錯煥成  
于秀範珪稜曲盡于寶勢極盛王之能事示黎獻之茂  
矩睿哲之才也緝布朝經敷求民隱具明徹寢是晷忘  
膳敦遣八使廉察謠俗之弊申敕列牧沛發勗農之詔  
核名實以無濫擘權綱而盡在懋建中和既陶甄而獨  
化兼總條貫若金玉之相振國容眊令而動朝章設象  
而備政理之舉也小必兢懷慮乎辛螫無逸存誠執為



元龜居循興凡之銘動亡戈獵之喜六飛奉駕靡數蹕  
以煩民十產罷臺惜暫勞而役物躬行素尚循致太寧  
卻纂組之害工破雕觚之返朴頭會之賦無斂根著之  
萌悉裁訓雅俗以歸厚扇廉風而激薄黎蒸罕乎滛泆  
飛潛遂其翔泳風化之洽也慎執邦憲昭示明彛理或  
註誤雖重必待情或干犯雖細不宥防吏議之寢蔽設  
使匪以延納左嘉之枉必達北軍之章靡亂酌呂侯之  
制審簡孚于三千條用漢皇之心除慘酷之五十事刑

典之平也諦酌三策輯修善經武節馳逝威聲霆振執  
柔轡以善御驅戎駕以遠撫旌旗千里弭朔塞之遠征  
干羽兩階服苗民而狎至燕弧委勁而不用敵火投烽  
而徹警治軍保大示天子之守在四夷侯海來臣知聖  
人之生於中國武功之戢也崇儒術宣國猷登閣三代  
之英罷黜百家之學揭仁誼以浸太和之俗縉文物以  
暢無垠之聲紀律煥巍容典緝備學庠講道而申悌樂  
府登歌而協律乃復張英毅而在御掩俊數而擢茂設

旌賁以來巖穴之士物色相望復制策以登褒博之流  
方聞並進文教之盛也若乃基緒會昌民俗寶富修祠  
吉土比歲登乎縉儀昭孝闕宮以時修乎潔祀肆類禋  
宗之禮著思文陟配之詩作德澤隆洽功業震耀衆變  
諸福儲祥徵祉故瑞日流景喬雲駐靄星暉露潤乾之  
符浸潭而享其應嘉生挺姿珍羣育質月至日集坤之  
珍絡繹以效其報丕律既顯蕃休滋至方將巡岱嶽而  
展采陟仙閣而封檢嗣烈考之茂實昭聖帝之盛節粵

若歲在作噩月維仲呂紹隆綿颺之緒誕育猗蘭之所  
若夫乘離正位所以肇繼明之業也執衡在序所以示  
丕平之運也德盛于火所以隆炎赫之期也性屬于禮  
所以昭揖讓之治也惟聖間出與時相符于是七相五  
公鼎席之輔羣司百執朝紳之伴相與仰逢吉之辰贊  
重雍之旦酌鴻典而具舉罄亮誠而善頌以謂行健不  
息美利天下乾之道也予以叶宸算之常久體仁以長  
資生萬物元之義也予以配鴻名之首出叅攷罄烈稽

合棐藝

案原本作棐頤文義難解據書洛誥改今字

願以徽稱紀于嘉節臣

志虔達帝俞俯遂若乃緹帷宿設藻衛環列銅烏遞風  
而細轉玉虬注漏以遲度銀題朱網斂夕靄以蕭寥采  
眊英矛晃晨暉而容與金璆在肆應節而徐韻伊銜組  
樹羽之器率陳于陞次珪帛充庭移珍而來享雖異域  
殊方之賁亦備于壤奠奉常整儀而辨等臚句唱警而  
傳導朝弁就陳陞戟嚴列皇帝鳴采茨以榮步凝邃藻  
以臨幄張麟文之席搖雉翟之扇帝暉煌煌燭于周行

若北辰拱衆星于中央朝容祗祗伏于宸威若湛露匪  
太陽而不晞森然拱著之位穆若陟降之度傾心胥向  
動色相趨于是上公進而言曰陛下席曼衍之圖隆適  
之德道叅侔于往初澤羨溢于潛邸宰臨方夏兼並神  
明勤于邦而勿休介爾壽而彌億臣等樂景化之宸被  
省親逢之重幸惟門弧之在旦罄野芹而申祝謹奉觴  
而載拜上千萬壽制曰俞舉公之觴風行之令一降蒿呼  
之聲四達下陳齊肅之志上諧純嘏之祐緝憲交舉華

紳風退穆若歡頌由神臯而及四方薰然太和自編氓而  
及羣類宜乎後天難老與日並明撫五辰而凝績迄至  
登平據三靈而獵福保隆久視夫祝堯為願著厥華封  
之言誕聖流歌載乎唐室之典盡善之美乎虞帝長發  
之頌乎商王矩矱具存颺流不泯下臣寢陶釀化被服  
素芬輒陳擊壤之歌仰祝如山之算稽首濡翰謹獻頌  
云天有成命基宋之盛德垂後兮於穆聖皇臨朝有光  
道冠初兮里社之鳴喧然有聲顯受命兮帝生于室神光

四溢觀者悸兮帝御于宇懿和宣布蕩難名兮執衡在  
序達樞流祐昭有異兮北斗迴杓舉觴于朝達臣誠兮  
南山之壽極天且久垂無窮兮

國陽大報頌

臣聞職乎覆載天地之化均推乎功德祖宗之誼一化  
之均者其報等故明察之祀曾是而並升誼之一者其  
孝同故妥侑之主無嫌于交饗此設教所以本神道議  
禮所以沿人情者矣矧夫兆福時于陽位差穀旦于天



正陟降惟寅采物具舉三靈逆釐四海來助對緝禮于  
盛際進明德于升聞邁駿有聲上帝穆其臨汝敷聞于  
下三后赫其在天巍巍煌煌禮之大者是則耿命之所  
集至聖乃興精意之所禋嘉生攸降著在耳目合若符  
節天人之際不其顯哉國家蓄五勝炎靈精之聖上席  
四葉重雍之烈丕冒綿寓休有神器若其冲用居質淵  
泉而博厚妙年纂服神靈而敦敏天光內發乾亨首出  
金玉其度神明其位三年之諒闇既言乃驪復旦之光

華重合于帝建號之始望乎殄行而朕師不震有洸洸  
之武持盈之際秉其文德而多士對越有安安之思奉  
養長樂躬高世之三行有匹夫之孝內睦公姓親在庭  
之五大有家人之禮一夫未獲則矜而弗喜一政未乂  
必退而更化和氣溢于萬物厚福浸于羣氓輩焉若泰  
山之加四維昶焉如宏綱之經萬目天下之大本舉矣  
帝者之丕功集矣方且軫無災之懼愀若以薦辭歌小  
毖之篇周爰而求助武銘徧于戶席漢諫緝乎帷囊謙

尊而光業久而大天啓淵慮魄兆嘉貺若曰三服容于  
自損而玉帛得以加六膳可以自嗇而牲牷不敢愛況  
三年之祀疎則怠焉七里之兆往不勞止幸天之相而  
歲之易也朕將再執遵豆以郊見于神祇令下于源絲  
出而紉于是當國之輔刺經之倫莪莪以相趨翼翼而  
旅議莫不稽仙源之自酌聖考之規謂夫皇基所開系  
自真祖故先祠有景靈之謁元命申錫主乎魄寶故已  
事有玉清之拜尊親兼極變于禮而得宜先後不違過

乎恭而何害定命茲允前聞夔絕既而寶穀登實良農  
告休日舍于箕卦御乎坎解竅律裁同一氣而未融漢

絕

案漢書叔孫通傳與其弟子百餘人為綿詭原本作漢第無攷今據改

棲野繕多儀而

豫定于時百工庀具千官聯職上公端委誓于文昌之  
坐天子淳濯齋于端闈之寢屏舜殳而易饋掩漢筭而  
停讞漂雪天慮秋游氣辨俄而紛藻仗出皇居頌真場  
躋太室祝嘏並詔臣工胥集貴聲之樂登歌于堂上合  
食之主流出于戶外俯伏奠獻悽愴齋明迪神貺而溥將

勵孝思而極摯始復御威輅翳華芝纖阿扶輪大丙前  
馬抑繁吹而不作遡陽郊而徐騫軍輜雷動神旂電  
舒八鸞異響而均和六龍駢首而如舞豪英之士玉色  
而同輿葩華之雲金柯而擁蓋豹尾樹後皆為省中鉤  
陳旁翊是嚴帝座背天闕轢都門三條荷衢而平趣帷  
宮百靈護野而遂至祠所皇羽設邸煩幄綴珠門竄窳  
而表旌天宮崇而垂幕若夫圓壇中立神垓遞降綴食  
惟旅陪祀相望夷酋司燎田首施燭且其巽雲房俎羽

林秀華之品宿設而芬樹鳧鍾鳳箭琴絙瑟越之器凝  
鋤而聲展龍常瓊釵飛輪疏轂之乘夾右乎道周星槍  
班弩戴鷗被繡之師髻鬋于璫次日在癸丑夜半冬至  
百執就列九賓相儀不教不吳有嚴有翼皇帝被天袞  
執鎮圭儼邃旒卻黃屋槃匱奉濯親就于東壘茨夏擬  
音徐陞于午陞上帝富媪南嚮異席尊之至也烈火神  
宗左方並侑情之盡也天子一獻以致虔藩戚參奠而  
成禮粉庶豆以孔碩揚信辭而無媿歌鍾詠德藹坑谷

而皆盈羽籥振容率鳥獸而咸舞連珠合璧屬于象者  
無不歆喬岳翕河統乎神者無不秩羣官分命以惟恪  
衆神受職而交驩酌福飲以浮椒峙榘薪而熾燎皇猷  
允塞熙事備成回珣輿御帳殿冠劍旅賀兵師齊躍逮  
長日之升晷麾洪頤而復路峇峽南闕國貯天臨之儀  
膚寸東雲民希雨施之澤既而端鳳展揭雞竿大令辰  
告而在邦必聞衆青並肆而與民更始是日也塗歌邑  
頌仁翔德洽逮鰥已責優繇緩調在疢者濯居幽者炤

盡解犯命之網措刑于三千無出今年之租興頌于什  
一亦既讓德不處歸勲有恪練吉日朝密都叙拜貺之  
儀罄謝成之恂再荷百祿以綏兆人盛節能事斯為至  
矣臣嘗學舊史竊訂大猷以為宋雖舊邦而其德維新  
郊雖典祀而厥應尤顯當盛禮之草具也兩宮叶議周  
旋抑畏固避號榮之舉上儀之將展也九河順道切和  
疏寫亟舒昏割之患吉土之親饗也隆冬變候密清和  
照訖無陰霾之祲是三烈者不待瞽史而識天意之悅



無煩巧歷而知帝運之隆  
砥隱乎殊休覺悟乎黎獻  
跨風遠古垂照來今將使  
允燦者咀其餘甘猗那者  
照其絕煥斟酌飽滿飭厥  
性而用和滋液滲漉泳湛  
恩而無際非我休運其疇  
宜之而臣汙韞朝倫濫巾  
冊府陪委粟之筵祀叨甘  
泉之奉引目飽懿鑠心萌  
詠歌罷黼黻之張獲聞于  
夜誦均蟋蟀之候難默于  
秋吟願紆感發之誠少抃  
鴻鈞之世拜手流水汗謹  
次頌云上帝屹壇兮崇造  
天二聖侑享兮嚴吉蠲神  
光焜上兮風肅然欽柴

皇燎兮升高煙肅斯露澤兮浸羣元叶風順氣兮翺天  
淵垠開閭決兮曼壽延表世題期兮彌億年

孝治頌

臣聞人肖天地故聰明之性以發君為元首故教化之  
端是屬因性以飭順則貫三才而靈萬物所由貴也因  
端以闡序則加百姓而刑四海所由廣也聖人尊其祖  
然後嚴其配故曰能享帝于郊王者奉其先然後思其  
孝故曰善述人之事若乃挺至聖以獨運警含生而知

勸纂戎紹服兢業一二日而惟幾推誠顯猷尊親千萬  
人之所悅不家至而日見大訓以成因天明而地察至  
誠交感禮樂不變而盛夷夏不威而服嘉生紹瑞非號  
召而自至烈風迷雨不禳禱而時若輝光篤實以臨下  
滋液滲漉而懷柔綏之斯和變至于道畢天下之能事  
者其惟大孝矣乎我國家基命太初凝圖無外紹五精  
之正統而炎靈獨擣陟百王之叔世而敦風載始寶胄  
系于霄極至德結乎人心巍巍兮皇階灝灝乎帝籙太

祖包戡武之度畫牡荆以麾天下則僭偽之風革太宗  
隆右文之治擁蘿圖而稽古道則聲明之禮輯真宗席  
御辨之正刻喬峯而施顯號則天人之際交三聖尉其  
嗣興萬物以之衆服宜乎流錫羨之慶暢猗那之業皇  
乾開與子之命清廟歌承祧之制重熙累洽寢講乎大  
猷開物成務允鍾于亨會故聖上之統嗣也龍見淵默  
星輝海潤操斗極以布席協帝華而居質疊疊穆穆神  
禹之紀綱夔夔蒸蒸帝虞之齋慄以謂可久可大聖業

也故明德而日躋不愆不忘舊章也故先謨而時憲若夫守文繼體之盛準自家型國之徽烈后辟行而未盡典禮放而難循以萬乘之尊躬匹夫之操由不匱之志奮無窮之烈者又可得而言矣當其正位朱邸飛名蒼震主宗器以受純嘏宅前星而擣景鑠父子之篤天性也故日造于寢門君臣之義至公也故不絕于馳道奉承大統協田龍之占務近正人無鮑魚之嗜不因乎喬梓之戒而至性內融不因乎羽翼之成而羣心自定先

帝功極道備深居高拱方將玩赤水之秘寶蹈汾陽之清塵為于無為事于無事乃啓一二之元老左右之皇僚率籲同心陪輔儲幄委庶政以裁決付大命而緝熙陛下式在妙年弗獲牢讓博覽兼聽迂身抗設法司過之史以輔乎闕遺操監國之勢以光乎威命聖人作而萬物覩大明繼而四方照此世子之孝所以教天下之事其親也迨夫文考憑玉羣后在庭設綴衣洮潁水舒德音揚末命陛下鳴噓流涕永悼于厥心尊嚴若神嗣

躋于大寶居廬啜粥蹈布衣之難攀髯號弓極人子之慕百官咸聽于冢宰七月遂至乎同軌春秋大乎居正而即位之後踰年而改元昭穆本乎顯親而因山以還祔廟而作主縣燧穀以凝感遏伶簫而銜卹三年之制無改于故常一惠之名首尊于洪顯矧以漢家廣祀作原廟而游衣冠故我敞景靈之庭奉安乎法座皇世訓道著大墳而冠丘索故我寶天章之錄渙揚乎遺懿奉先之文備矣追遠之誠至矣而猶恭默思道效商宗之

不言敦朴為先法孝文之高世此諒闇之孝所以訓天下之全其禮也先是顧命之詔受遺有屬升文母之丕號克舉懿綱開長樂之東朝共熙大事陛下祇適寶訓欽奉慈顏調法膳則躬謁乎璇闈量衡書則先上乎椒極威顏咫尺周旋咨度內法純儉從大練之風叅講臣鄰無冒絮之責固以道高于興夏功茂乎翊周均載物之至德凝覩天之奇表柔風扇于碩豔碩惠淪乎骨髓善教興乎闡闡至化衍乎垠堦豈徒罷畫工者三十九



鍾政是用請散脂田者四十餘頃利均乎下書曰惇叙九族易曰保合太和緬遺訓而有屬此奉養之孝所以率天下之廣其愛也古之哲士僅行一節猶或載緹紉而騰茂實今茲陛下克舉三善固足蔽窮壤而流淑聲矧復秋駕載懷明緡慎出仆威械以除亂本薦馨德而培福基時禁備修山澤免夫童竭嘉生報降菽粟均于水火祥琴式御而深詔郡國興廉舉孝新宮既享而親執豆籩類帝禋宗澤周乎跂喙之微信及乎豚魚之隱

咨俞故老日臨軒陛未嘗忘乎獲友欽恤明刑齊居蠖  
獲念惟輕于疑罪竇行乎曰慈曰儉而媮俗以敦退託  
于不敏不明而下情畢達是故先帝棄羣臣而海內如  
一太后輔丕業而神功莫儼陛下當耿命而天心昭合  
三辰安于次舍五氏銷乎祥青癘疫不作人神靡雜非  
夫動按成法見堯德于羹牆居念遠圖編武銘于觴几  
盛百年之化善人之殘殺可勝御七月之篇王業之艱  
難斯在日慎一日新之又新冠百行而為宗放四海而

皆準經曰明王以孝治天下此非其效歟由斯而談則  
泰山四維不足為其安也蕭韶九成不足為其和也如  
日之升如月之恒不足為其熾而壽也與天比崇與地  
侔資不足為其貴而富也所宜絨繆檢鏤玉牒以誌其  
髣髴操牛尾舞鳳簫以歌其緒餘下臣資性素冥才業  
無狀陶被至化鼓舞下風情發于中竊擬游童之詠善  
無求備或造稗官之說生不敏敢獻頌云皇穹佑民聖  
心闡序世詠在三天常惟五大孝稱首異倫式叙至德

要道人存政舉赫赫炎宋專以孝治身正家齊天經地  
義四聖迭授羣元大庇我后篤行亶無遺懿昔在初潛  
溫恭自天寢闈問豎學肆鳴絃陪樞輔極納麓承乾滋  
曰子道為天下先文考大聖道揚末命終陟垂謨傳歸  
有慶創鉅纏痛諒陰積行茲曰善繼為天下正洪惟聖  
后儀于坤德參決萬機寵綏四極理內正外和聲怡色  
茲曰廣慶為天下式蚩蚩之氓含滋襲馨如網舉目若  
景隨形翔仁率土浸福重溟一人有作萬世攸寧

天罰有罪頌

或稱皇初之世不賞而勸不罰而懼豈曩策之彌文哉  
讓者云否彼固未識夫震耀之飾天威剛健之奮乾體  
也粵若聖人制海內之命據天元之尊總秉權綱參叙  
典憲不有威辟不足以震元慙不有懲咎不足以章顯  
戮用能燁皇靈憲宗軌丕天之大律一民之至權者已  
臣人在宥列聖繼統際天丕冒亘地砥屬仆威械以去  
殺襲道樞以訓儉恩裕洪暢容典賴盡萬物取足合祛

于皇極百靈隕祉動震于珍物然猶左賢右戚均權布  
寵百辟箴官內平而外成五大在邊番述而遞上紬繹  
羣慮防檢來患恭迓永命觸滌多辟勤勤懇懇非消亂  
之謂歟然而善制未能無敝殷憂所以啓聖迺者巨猾  
乘間朋邪締謀嘯譏祥之妖席鈞宰之貴弗戾蜚語怙  
有奸計為國取怨在內為宄遂欲包禍心以竊發執左  
道而干紀城社無薰燒之畏宗社有阽危之忌天命不  
滔奸惡具露輔臣建白醜黨震壞赤車具獄而來上苑

豎伏質而前死皇帝陛下深拱諒闇覽照前典重當國之職慎退人之禮詔曰冢宰之任天下所繫今丞相謂自底不令其上大司徒印綬而攸司程奏百執抗言無將不誅與衆共棄願伸大戮以懲元惡帝曰朕不忍致于理其謫于朱崖然後起弭之臣明枉結之獄培克之貨簿上于官附麗之黨肆赦一解漏鯨喙于網目催虎吻于市道篋有辯論盆無漏暉方內謚清天上澄煥攘去蒙氣質延大和惡草絕而善苗興清風翔而羣陰

伏人靈紆憤道路相趨于是搢紳之徒喟然稱曰先帝  
違豫柄臣間釁陰肅不逞規投天隙食棧弗變指莠待  
減陛下先斷宸慮探觀時變仗文母之援攬列辟之議  
殄介不靖終曰未減宇內澄洗蕩無餘灾定茲寶業極  
高山之安殲厥渠魁易家人之名智不回慮惡未旋踵  
事已決矣昔滔天殛而虞功著流言放而周德奮觀闕  
誅而孔制烈寶瑟僵

案寶瑟僵漢莽何羅事  
原本作寶琴今據改

而漢基永

皆有常之盛準撥亂之通術所由來舊矣烈祖二宗暨



灾除害肅清衆愚若彼之深也太后聖上建威聿萌祇  
適先訓如此之至也宜乎奮景炎燦淳烈春秋謹始之  
制釋洪範作威之害聞賜無彊之眉壽揭不朽之尊名  
此其時矣盖天子勞焉在疚貶成抑定未遑制作事也  
下臣鋹跡遐外邁辰熙盛吮甘實酌微波者有日矣以  
為罰不失罪者賊子懼賞當其功者勞臣勸今陛下去  
仁辨百無罪而兆民賴萬祥集非天下之至感孰能預  
乎臣擬下品不足紀次新頌輒敢述輿人之詠簡康衢

之詩亦擊轅折楊之比爾其詞曰於鑠炎宋奄受方國  
監觀上帝底止明德越在四世惟新百度往聖上仙大  
明績務叢爾孽豎乘間偷權放命于國興辭託天罪惡  
腥聞建白攷治醜黨銜刃元兇投裔乃下明詔誕告多  
方橫貸枝附昭雪忠良三靈不怒百寮動色絕其本根  
勿使能植去危即安萬務有益聖皇敷之不息暇逸慶  
無疆兮惟休慎無疆兮惟恤

元憲集卷十六

欽定四庫全書

元憲集卷十七

宋 宋庠 撰

頌

維摩經諸品頌

并序

如來之教有真語有實相語之真者不以辯妨道相之  
實者不以物障空何則道本無言而應有言故言之者  
非我法本無相而資有相故相之者自彼是以聖人鼓

羣動雕萬物終身搖喙而默理常存狀六塵形四大彌  
劫利見而虛宗愈寂此權實所以共貫空有所以兼融  
破物我之長圍航死生之巨浸假道于彼岸托宿于泥  
洹倡狂妄行而蹈乎大方茲解脫所以不思議也維摩  
詰者可謂體其真實矣若夫毗邪示疾身同凡品香積  
致問化超神表厯詰衆聖則辨均有情深入法門則默  
過無響精而諸佛不得異稱而他見不得逃可以名而  
名無所得而得其真大乘之高轡聖域之幽闕者焉而

昧者方覩然疑淨穢之一區同異之一轍且欲遺凡以取聖封大而擯小責真空之所在求希夷之所到大馳波蕩若畏岑而就攻可不哀哉故斯經之作所以救斯患也議者又謂無緣則無法有教必有心淨名現方便以拯羣迷文殊因酬對而破諸蘊夫至人者亦有為而然耶余曰不也夫震雷出地昆蛟奮蟄長飈薄野山林效響彼寧繫懷于震發而措意于怒號哉物自爾爾是則慈心所演大音所唱羣生鼓舞三界歸往不知所

以然而然者亦猶是焉余稚齒多艱中歲銜卹焚焚殘喘廬于都外每閉戶焚香呻吟梵帙升濟先福是焉攸託而心之所嗜復在此書爰因成誦之隙竊效重宣之義且經之所統品凡十四始于佛國終于囑累其因緣之本行證詰之細條秦國大士注之詳矣雖欲黽勉強加論辨是徒飾筌蹄之具何益魚兔之實哉然大悲普熏軟語傍浹時有悟者燿然如高燈之破闇灑然如仙丸之愈疾視昭毒已不能無喟然之歎故畧因諸品各

為短頌每緣短頌先標總意嗟夫法藏淵曠聖心超邈  
欲以幻相之文字強標大道之崖畧知我罪我將焉避  
之含毫洗心辭不逮意云爾

佛國品第一

夫大空無倪而穹隆摩谿之形生乎障空者也大塊無  
畛而封埒遠近之界生乎有地者也然空塊之狀詎有  
識其全耶是以佛國無方隨感輒報士之淨穢由心之  
迷悟境之廣狹視機之大小萬法取足于我無為故舍



利佛以土石致疑梵王以天宮自況或翬或潔皆出彼  
心妙域湛然未嘗有異如來之旨其在是乎頌曰大明  
經天容光必照隙取圓輝戶分方皎方圓雖殊照乃一  
區佛土之應其由是乎噫嗟羣生出沒三界觸妄成迷  
逢塵作閤行業分鑣報緣異聚我國無方隨機小大心  
淨則土巖智昏則境穢穢本巖體嚴非穢外譬彼衆生  
是即法城此如可捨彼亦可營故曰深心直心隨意隨  
行無入非門何馳失境法則萬差此惟同應應之者誰

初無有定稽首能仁超名離真在天而天在人而人梵  
螺依慧驚子求因復攝神足方如法輪

方便品第二

天道非言不曉非道不遣聖人必立言以示教故利能  
及他及他則方便之術也終忘言以除累故法無所執  
無執則真實之體也今維摩因身以現疾因疾而談苦  
痛自詬病而使求法身法身本空吾復何患非遠覽之  
士詎能因末而達本哉頌曰非有非無是惟法妙不因

不緣法亦無詔因緣伊何標宗示兆標示伊何方便為  
要皇哉淨名妙喜之英來游忍土將開化城示身有疾  
以質無生身本無狀如炎如響聚沫虛根春蕉妄想電  
影天外泡影水上一念不停四大誰掌嗟此妄塵當求  
法身泮窮得淨幻滅逢真希微其象眇莽其神故吾自  
故新吾已新迎之不見其首隨之不見其後暫住非天  
長存非壽稱謂皆泯虛空等久方便之言當如是受

弟子品第二

夫萬法以至虛為宗至變非一途可應操此者失彼專  
內者忘外此自然之勢矣若全人者烏可以彼此內外  
而名哉故聲聞之流各保偏見欲無被詰其可得乎本  
經自舍利佛之宴坐至阿難之總持凡十弟子雖所執  
不同而受呵一也今不復徧舉但會其趣云頌曰大道  
不器大方無隅至人乘化何德之拘譬夫百體兼愛冥  
符既非獨毀亦莫偏譽萬法萬善于何作見道不可取  
塵胡足遣有合皆如無行不踐孰為晏坐孰為總持我

將得是誰復畱非是非一對物我交疲故為者敗之執者失之無為無執敗失疇依嗟嗟衆賢聲聞第一或欲實于諸空或欲空于一實觸憶成呵臨緣會詰自疾未除安能問疾

菩薩品第四

夫殆庶之士去道猶一間耳而羅縠終隔不亦病哉故金粟縱忘言之言辨無得之得盡破諸相直造大方菩薩所以見善必遷而聞義彌服矣然彌勒光嚴持世善

德四聖人者皆親炙妙訓超證上乘今乃自詘于一時  
迭和于幽唱亦以同獎大教非優劣之言也故歷叙本  
行而疑其分身云頌曰過去已滅當來未至交臂不停  
誰為正位敢問彌勒將焉受記至人投足莫匪大方還  
形法侶即物真揚敢問光嚴淨土何鄉至真無真諸有  
非有帝釋施女天魔稽首敢問持世胡為弗受有施必  
盡有報必疲一法都泯羣生自熙敢問善德何財施為  
聲須叩鳴道以人博不有風斤奚彰鼻聖超迹示化分

身解縛大士相資孰究孰度

文殊問疾品第五

夫淨名之談本記于病其要以謂菩薩與衆生一體安穩與病惱同源悟則疾愈而無衆生迷則病興而累慈父累本無物故聖人受大患而弗辭慈亦無緣故悲心貫億劫而彌厲復尋斯要其權智而已乎是則一室之談乃十方之拯溺四體之苦誠萬物之良醫濟度之功于此為大頌曰示疾之端請研妙意菩薩無疾衆生有

累累則病始悲心作矣譬夫拯溺先濡厥趾將度生死  
理無獨異嗟爾有情相靡相傾貪愚齊汨煩惱根英虺  
蛇伏篋怨賊持兵毒中慘外何苦能名至慈匪緣至真  
不有我病無形我形非受即幻為藥因生亦醜彼如有  
痊此亦何咎一牀之臥一室之空衆魔作侍諸見來同  
徜徉象外溟滓環中善哉此會澤浸無窮

不思議品第六

夫心而思口而議常人之情也若思之不得其始議而



不測其終心口之識已殫變化之功彌大則向之思議者得無惑哉窮神者不思極變者不議神變自爾于我無為至若舉世界于鍼鋒納妙高于芥子毛孔受四海之水大室包須彌之牀自神而觀皆應之粗迹而昧者挈挈然欲求于忖度之內不亦左乎惟虛而融之然後解脫之門可得而闕矣心曰心識所到是可思議思議非及乃為真諦真諦本空真空不二無空之真遂超實際請問此法將焉寄名汪汪其大杳杳其精不動而無

不動不生而無不生至虛可實至晦可明芥粒藏山毛  
根注海寶坐由旬陶輪世界彼入不知此容無閼本相  
皆如真樞詎改大士惟神用之靡勤至權反道至智同  
塵二乘迫隘惑想紛綸三世諸佛同歸此因

觀衆生品第七

夫昏寢者非大呼而不覺狂驚者非至疲而不復上聖  
卓然哀真性之自溺又知諸相之非實故巧諭以曉其  
惑縱苦以疲其心俟夫昧者之自昭勞者之自止則向

之譬諭苦惱同為一妄妄既去矣自然實相衆生正觀  
其在是乎經曰如幻師觀所幻人則真意明矣頌曰茫  
茫羣生本一真性少念或差千波莫定覺外合塵迷中  
認影三界狴牢四生檻穽狂走昏衢羣嬉苦境卓爾大  
士知物本無幻人教幻吾體分吾權空遣實假妙損麤  
千因藥倦萬譬針愚諄諄度人種種非已洪纖一吹幽  
明一視惱之非怒愛而孰喜無作而緣無為而恃茲名  
說法茲謂行慈天不擇人而覆雨不擇物而滋菩薩之

惠平等之悲我為是觀何慮何思

佛道品第八

夫道非遠人而人自忘道此品之旨以謂塵勞即清淨之體生死即解脫之根而羣動糾紛真性流宕先覺之士乃強名佛道以正之正之之方必久處塵勞而安住生死然後能功被于無外智周于無內一念所及諸相皆如非天下之至精其孰能預于此矣頌曰法無可名寄之佛道道無可異同之法寶何大弗圍胡微弗造萬

表賦陰干聲應考以善為善善則非真以垢為垢垢則成塵真善者因善而離相無垢者即垢而明因譬欲寶珠沈淵乃獲譬欲青蓮憑泥後植穉牧雖下監之善職鳥喙彌毒工之惡石佛道如是佛種亦然羣生共體諸業同緣何去何就隨照隨圓二聖相發音流大千

入不二法門品第九

夫道者何也至真妙極無為之稱也常存于算數之表獨化于有無之外不可以一一不可以言言一若可言

則一與言為二言而可二則二與一為三自此以往巧  
歷不能舉其要而況其流乎是以聖人知萬法之彌綸  
億計之差別皆出于妙本而攝以真乘真乘之門入則  
無二二而不得其偶一斯盡矣寧必除一而謂之至乎  
毗邪默然義在于此頌曰法有萬門宗無別諦妙不可  
一真胡取二衆聖隨方聊存遠寄悟入殊因圓明共味  
茫茫巨浸赴者百川到無前後終為大淵夫何淨名乃  
曰真入性相皆離思量靡及仁者辦法于法有言言既

有矣名何一焉文殊雖言言于無說無既言矣攀援未  
絕超相踰言是謂默然淡弗調而味足琴無鼓而聲全  
茲法門之不二又何得以稱旃

香積佛品第十

夫祛近惑者必標至遠之趣開常見者必舉非凡之境  
然後解耳目之縛平智慮之封內外曠然始造真域此  
品之旨以為香積無上之界寶飯普重之慈乃釋累之  
妙筌融神之化國爾使庶幾之士因茲領解必能遺其

所寄而涉乎大方無捨無求然後為善矣頌曰巍巍上方  
粵有真場不立他法惟聞妙香河沙四十道右而長希  
微其野眇葬其疆淨飯惟馨寶器惟潔孰往取之捐梯  
泯輟甘露其味大悲其熏孰能銷之悟法離塵香界惟  
何高遐若彼返照循元迷悟而已香飯惟何普濟如斯  
稱根付飽粗妙之資是謂冥權是稱寶智幽唱無響孤  
風超詣卻顧下方居然不二敢告人天領其標致

菩薩行品第十一



夫至精而不能拘至異而不能同有累之大者也故此  
品覆解香土之高妙乃鄙穢之筌蹄懼夫聲聞之流因  
而取相且魚獲則筌棄鳥盡而弓藏鄙穢之累既祛高  
妙之名亦滅若將舍一而取一其患寧有既乎故香國  
衆賢悔生劣想迦文大訓兼忘有為慈音一宣內外咸  
濟矣頌曰香國衆行號號大千聿來下土將契鴻緣於  
穆迦文奄荒法界植相觀空逢言作解惟彼大士悔生  
劣想祇聽我辯疑情自蕩想何為劣穢淨是分靈照一

區浩然無垠疑何為蕩斷常皆去不盡有為無為不住  
有為而無所有無為而無不為三乘我出萬行焉依法  
門若是真諦胡疑

阿閼佛品第十二

夫垂至妙之言者必存至妙之實聞言覩實然後學者  
信而不懈信而不懈則道將為一道為一則言皆妙而  
妙皆實矣故至人神奇于外深根于內若妙喜之寶界  
無動之尊顏于彼之所生于此之所化未始非實而昧者

不知必觀相而後欣造形而後悟陶冶麤滯會歸冥極  
則示權顯相其得已乎此品之宗義則然矣頌曰洪惟  
妙果必有妙因厥德無上其功乃神無動之尊妙喜之  
域萬善所藏鴻緣所宅龍象未躋人天坐隅無垢是生

維摩詰無  
垢稱也

馮儀孔碩善逝揚稱欲顯其方冥權普會至

變交相不興于坐不習其祥斷取淨界聿來茲疆不念  
所臻萬物咸覩切理循階娑娑接武以空入空無去無  
取清淨現前莊嚴篤祐大衆已觀復歸其所

法供養品第十三

夫陳玉帛鳴鐘鼓事神之末也具衣食張室廬懷民之細也誠向不至物將為累况希微無上之法寂滅忘言之精欲以像刹之麤緣死生之穢業求其妙證不亦難乎故天帝曉殖福之甚多月蓋悟深經之最上賢剗大士因之受記則供養之勝捨法何言哉頌曰道有所寄心必生恭人天雖異歸仰攸同其歸安歸歸法實相其仰安仰仰法無上相已實而何歸上既無而曷仰其知

此者是名供養若大千界若一劫時稻麻衆聖香瑤多  
儀四天樹刹七寶栽基施寧有量福亦無涯至哉妙音  
顯厥真理謂相終淪謂塵曷恃一念回嚮福多于彼寶  
蓋因緣提柏踐履寧異人乎我身如是

囑累品第十四

夫道無限斷世有來今無限斷則歷羣聖而一如有來  
今則揭大事以相付諸篇必以囑累為永者亦未濟終  
焉之義乎頌曰教不孤運心以契傳源開派萬照一燈

千丕承慧命肯構鴻緣稽首彌勒茲無讓焉

元憲集卷十七

欽定四庫全書

元憲集卷十八

宋 宋庠 撰

表

十月一日奏告南京鴻慶宮太祖皇帝表

伏以告朔紀常戒寒協序瞻言像設載極時思恭惟尊  
謚皇帝功冠往初道隆燕翼肇王基于有截享天配于  
無窮適履孟辰永懷遺烈



十月一日奏告永定陵真宗皇帝表

伏以就盈紀月司閉成冬惕悽愴于非寒悼劬勞于罔  
極恭惟尊謚皇帝道勲冠古德澤涵幽罄圖牒以翰祥  
擁慶靈而祚世眇冲攸賴摧感何云

十月一日奏告永定陵莊獻莊懿莊惠皇太后表  
伏以寒律甫升孟躔適會方班吉朔實感先慈恭惟尊  
謚皇太后德茂坤元化流椒極溢話言于彤史闕柔景  
于仙園追荷顧存舉成哀塞

十月一日奏告西京應天院太祖太宗真宗皇帝  
表

伏以冬朔肇端孝心叢感仰別京之淨刹宵華袞之真  
游恭惟尊謚皇帝神化溥將睿謀燕翼早禱在天之御  
參綿卜鼎之期方荷慶圖敢忘時惕

十月一日奏告永定陵真宗皇帝表

伏以天運弗停水行茲始感霜露非寒之惕結衣冠游  
月之悲恭惟尊謚皇帝功濟三靈道包衆甫軼鴻名于

上世業寶訓于來昆皇照靡渝時思罔極逝瞻靈寢無  
喻哀悰

十月一日奏告永定陵莊獻莊懿莊惠皇太后表  
伏以冬管命時歲陰布序俯愴戒寒之候聿深追遠之  
思恭惟尊謚皇太后坤載輪和人倫託始藹母闡之慈  
範溢女史之芳猷茂庇眇冲永懷顧復淒凝聲集感塞  
何云

年節賀皇太后表

元朔甫新羣萌僊達因慶儀之在旦感慈訓之違顏恭  
惟尊謚皇太后徽範映辰纂風冠古擁慶靈而祚世育  
微眇以承祧追荷恩勤永焉摧塞

賀西京應天院太祖太宗真宗表

伏以瑞歷開端羣萌達氣當治朝之普會極仙駕之永  
懷恭惟尊謚皇帝道冠往初文包載籍恢世年于鼎卜  
盛詒燕于孫謀仰賴丕休並深遐感

中元節奏告南京鴻慶宮太祖太宗真宗皇帝表

伏以商琯開秋舒輪既望感芳時之時謝邀仙駕以長  
連竊仰神姿素嚴靖館本弓劍軒臺之畏謹衣冠漢廟  
之游適履令辰敢通哀悃

中元節奏告永定陵真宗皇帝表

伏以秋序迎郊望辰旅夕趣企山園之重載驚霜露之  
濡按歷未遑因心若隕惟百靈之護野協六氣之在天  
嘉節甫新哀悰永歎

乾元節內中謝真宗皇帝表二首

臣忝荷先謨紹膺丕歷爰屬誕辰之慶實資聖系之開  
雖著節有常而銜哀罔極惟期慎守少答垂鴻

臣猥以眇躬紹承丕構因誕辰之攸屆感先願以如存  
恭惟尊謚皇帝茂烈欽明深仁溥博蹈百王之高致詒  
億載之宏模曾是適追敢忘善守幸循寶訓迄此昌期  
惟勤日慎之誠仰答天靈之貺

乾元節內中謝莊獻明肅皇太后表二首

伏以載震紀辰相沿著令爰覽慶儀之舊恍驚慈訓之

違矧熙盛之紹臻固保安之所及永懷懿烈但極哀悰  
伏以司夏凝和厥生名旦率朝輦而惟日緬慈訓以長  
懷恭惟尊謚皇太后德配坤靈化鈞天覆深戒練衣之  
儉勗成黃屋之勤事閔仙游感叢慶日庶謹承平之治  
永全保佑之仁

乾元節內中謝莊懿皇太后表

臣儻薄承基勗勞託慶方訂露囊之舊追懷甲觀之祥  
恭惟尊謚皇太后淑聖凝姿謙勤樹德飾尊名于嬭廟

留懿範于堯門慈訓所鍾眇躬攸賴永言顧復曷報生成

乾元節內中謝莊惠皇太后表

伏以訖致御辰誕彌紀節因紹修于慶會聿追慨于慈  
顏恭惟尊謚皇太后寶儉成猷體仁逮下參顧存于先  
命專擁育于沖人獲嗣丕基率茲柔訓敢忘勵翼少報  
思勤

冬節賀南京鴻慶宮太祖皇帝表



伏以周歷紀正魯儀侯物感迎長之命節惕追遠以叢  
思恭惟尊謚皇帝握紀先天開圖聲宇翼孫謀而可大  
謹神教以如存仰慕眸容式安真館未遑恭拜增極哀  
悰

冬節賀南京鴻慶宮太宗皇帝表

伏以天統肇新朝章有慶緬動時思之感式瞻像設之  
嚴恭惟尊謚皇帝至德孚~~赫~~洪規裕後享周廟不祧之  
配留軒臺如在之神仰庇孫謀誕膺邦社敢忘厲惕永

答延洪

冬節賀南京鴻慶宮真宗皇帝表

伏以氣運循元星躔迎至感霜露非寒之休極衣冠游  
月之懷恭惟尊謚皇帝道格無方威覃有截迪長源于  
浩劫正垂統于來昆尚託仙祠仰延威御式臻嘉節敢  
致哀誠

冬節賀永定陵真宗皇帝表

伏以歲律就陰冬元復始禮緣朝慶感倍時思恭惟尊

謚皇帝躬蹈聖猷誕膺耿命勒號榮而高世詒統業以  
當天神駕夕躋仙園在望永懷丕烈罔喻哀悰

冬節賀永定陵莊獻莊懿莊惠皇太后表

伏以流景弗居微陽載始爰屬嘉辰之會永懷慈訓之  
遐恭惟尊謚皇太后淑哲綏猷儉慈寶德茂擁存之善  
教協詒燕之深仁運隔仙游感鍾長日展巡未卜哀涕  
無從

冬節內中賀露香表

伏以律肇初陽景回南極育幽萌而有漸翕繁祉以惟  
新席眷上靈布和嘉節敢虔芳著用達精誠

降聖節內中謝露香表二首

伏以璿極監觀雲輶降格夙昭曠瑞實紀靈辰繫冬序  
之下弦緬仙游之駐駕敢忘薰奉仰答禧祥

伏以仙御降監靈辰著令每屬孟冬之屆緬懷真蔭之  
隆爰即禁庭奉嚴寶炷冀憑芬潔永導寅恭

天貺節內中謝露香表

伏以月集函鍾適迎于善氣天垂緣錯爰紀于休辰緬  
懷瑞節之端實表先真之志允依層禁恪奉名薰寶睞  
孔昭繁禧永賴

先天節內中謝露香表

伏以順啓秋辰素標瑞節肇先媒之寅奉迹寶蔭以惟  
遐爰被名薰上瞻沖境精衷有嚮茂嘏攸綏

乾元節內中謝露香表二首

臣某言伏以序協恢台辰標震夙享萬官之稱壽荷六

幕之叢禱祇燎名薰通誠寶宙益祈鑒顧永祐繁昌  
伏以維夏開端厥生逢旦循邦令祝延之會感天俾熾  
昌之祥虔奉名薰上通真界更期勵翼永輯休嘉

遂州天慶觀開啟為民祈福道場密告三清表

伏以西土奧區民生惟錯上清寶貺天鑒攸精繫道樞  
應物之宗有法醮祈祥之式已竭靖館即啟靈場敢密  
罄于虔誠冀嚮臻于介福庶茲默細普荷熙康

為南郊下元節更不予景靈宮朝拜奏告聖祖內

制表

茲者順攷禮文謹修郊報預涓辰于齋戒將致饗于仙  
宗惟水官校籍之辰有霞館奉觴之舊敢停常謁專歲  
盛儀沖鑒孔昭篤誠茲諒

為南郊冬節不備薦饗奏告真宗皇帝莊獻莊懿  
莊惠皇太后表

伏以迓卜天正紹修帝配聿嚴備物親款太宮惟盛禮  
之方虔懼別祠之致黷敢停常薦庶一肅誠

為南郊于大內在京外處道場祈恩保安聖躬奏  
告三清諸聖表

伏以諏日仲冬致誠吉時肅陳齋輅將次陽郊雖被濯  
之載虔賴聖真之潛護庶成嚴配永迓繁禧

為南郊于大相國寺道場祈恩保安聖躬奏告諸  
佛表

伏以廟裸惟嚴郊薰有典已涓景至躬迓神休將勤陟  
配之容願集綏寧之祉等慈無間妙蔭焉依



為南郊于景靈宮道場祈恩保安聖躬奏告真宗  
皇帝表

伏以清廟告虔紫壇陟配咸先期而藏事方率力以奉  
神惟是眇躬庇于先蔭益希保佑用克欽承

為南郊預告天地社稷表

恭以三載克禋禮遵舊典百神竝秩義重親祠俯冲眇  
之纂臨荷清寧之貺施洽臻嘉運丕冒羣生宜躬執于  
豆籩克奉承于郊廟庶勤大事仰答靈休涓日有期薦

辭惟恪

為南郊預告太廟表

臣紹承謀訓獲擁基圖茂臻太和寶庇餘福祇事陟配  
不敢疏忽三載而舉抑惟舊章幸緣歲成躬展郊報仍  
期裸獻用罄孝思繕禮有初薦信無昧

為南郊預告后廟奉慈廟表

恭以報本奉先是均明察薦罄盡志以一親尊緬惟郊  
配實稱祭首必躬而信敢憚于行屬茲順成圖厥祇事

謝告吉土紓慨闕宮方謹先期用虔孝祝

為南郊預告在京諸廟表

恭以郊報之虔厥惟盛典景長之序允協靈辰爰卜親  
祠式揚大號咸秩之禮來饗有期眷惟神聰胥祐邦慶  
太廟雅節奏告表

恭以郊配有期裸迎惟重瞻言清廟前戒庶工以時修  
除用謹齋謁歲事伊始薦信敢稽

為南郊預前內中奏告露香表

伏以帝時有嚴齋鑒竚駕紛盛儀而允集率精懇以方  
初敢奉名薰上通虛界冀孚眷佑永保綏寧

為南郊預前奏告內中壽寧堂皇儀殿諸佛表

伏以陽管將新郊祠有報冀徵茂嘏宏庇斯民方躬展  
于盛容更旁休于妙蔭永康國步胥契慈緣

為南郊預前奏告內中福寧殿玉皇北極諸聖表


伏以天統撓辰陽郊展報萬靈胥接四海駿奔率禮載  
虔惟神所相式通齋懇用竚冥休

為南郊預前奏告內中東園門聖祖天皇諸聖表  
伏以涓序一陽薦馨有昊已成期于廟時將躬執于牲  
瑄力是多儀理資冥祐敢緣齋告用集禧祥

為南郊預前奏告內中神御慈德二殿諸帝后表  
伏以祇率舊章恭承嚴配聿奏齋明之式將勤信次之  
行靈蔭所敷眇躬是賴庶成熙事無累先猷

為南郊預前于永定陵奏告真宗皇帝莊獻莊懿  
莊惠皇太后表

伏以推策涓辰燭柴令典適勤眇質躬對上靈惟齋裸  
之多儀竝訓謀之成式更祈慈蔭助集鴻休



元憲集卷十八

欽定四庫全書

集部

元憲集卷

十九至  
二十二

詳校官監察御史臣李陽樞

檢討臣何思鈞覆勘

總校官進士臣程嘉謨

校對官編修臣勵守謙

謄錄監生臣黃紹伊



欽定四庫全書

元憲集卷十九

宋 宋庠 撰

表

謝郊祀加恩表

禮天拜昨甫畢于鴻儀括土均休汎霑于異數罔功內

省悸魄無從

中謝

竊念區土以空疎誤承簡拔玷從官

而積歲尸榮祿以浮人凡最所更風猷蔑樹曲荷天私

之覆靡循官式之常起踐諫垣預聞宰牧屬兵農之並  
講當朝夕之勤咨徒竭陋愚無裨紀律力窮猶駕衆知  
敗馭之傷物重過權始驗持衡之殆遭時寬政勿汝深  
疵假淮國之一麾貿龍躍之再集皇心念舊祕秩升華  
移守汝田坐豐周粟會于郊而陟配嗟守土之恪居微  
藿翹誠孤匏擁歎敢謂伏蒙尊號皇帝陛下回輿作解  
舍爵推慈因勞臣工之勤胥暨州藩之廣綸書懋賞星  
驛馳音衍多邑于舊封倍榮租于真實命成難拒恩溢

無涯刳運豆駁奔莫覩陪祀之盛而公卿奉引了無承  
乏之勞逮流慶之叢臻亦覲顏而虛受恩慙云極度德  
奚堪惟餘頂踵之微或効涓埃之報臣無任

謝南郊加恩表

禮成陟配賞洽均禧優命聿頒兢心靡據臣誠感誠懼  
頓首頓首竊念臣本惟寒士獲玷近班駕自禁庭舉參  
宰府斗筭受任尋貽不稱之譏天地好生終靡加誅之  
忍特由諫署出布藩條積媿盈顏樹聲寡術屬陽郊之

大報罄率土以駿奔而臣越在守封舉深存闕無攝事  
贊儀之幸有累官去國之悲何圖拜昨之辰亦沛明綬  
之典書勲八柱爰極于上階進戶列侯更陪于大邑寵  
章叢被悸魄九升此蓋伏遇尊號皇帝陛下誕擁乾休  
洽敷人爵因雷風之大號席簪履之餘恩洒濯深疵振  
除往咎謝生無所固推不報之仁失旦思鳴或取自新  
之效大猷雖爾弱植奚堪徒誓銜銘未知酬塞臣無任

謝崇文總目加恩表

竊念臣早以片文誤階榮牒序服星垣之職入陪鑒禁  
之游凡在官司多塵總領爰屬仙瀛之藏廣收靈簡之  
遺度閭寢盈籤題罔辨特迂詔旨就擇時英俾分討于  
藝文且精求于領目遠襲九流之別近尋四庫之規通  
質舊章日程新課而臣首膺選擢最貿歲時未終刊謬  
之功已忝參機之舉緹鉛清局別委于俊僚山藪寬恩  
尋投于外服逮諸儒之卒業非孤臣之預知此者伏蒙  
皇帝陛下垂覽新書嘉聞善職追念摩編之久靡遺尺

寸之勤爰俾固功亦膺蕃數茂進文階之品真疏幹食  
之封媿集榮先獎浮願表上中經之簿莫接于清班出  
內史之方何勝于渥訓仰被燭幽之詔未知論報之階  
臨啟徘徊言因謝盡臣無任

謝降詔答諭立御書梵字碑表

賈文就刻譯侶叢歡因善護之成功皮率和而露奏紆  
頒制墨俯煥塵襟中謝伏惟皇帝陛下將聖自天大猷  
覩古丕承下武之緒兼通西聖之言聞其洪慈衛我羣

品惟梵文之流布乃佛說之信傳雖曰旁行實存成法  
比乘聽斷之裕悉標聲畫之元譬震旦之六文謹舌人  
之異說氣瞻雲漢文含日星奮天藻以題辭勒竭珉而  
庇宇古今參驗非科律之難分華竺雙提若迦陵之親  
演而臣幸陪法席親覩帝華不勝鳧藻之情用列鱗囊  
之感方塵清覽遽錫溫辭覺苑同文已預人天之會尚  
方乙牘更膺緣綺之褒徒篆情涯曷酬恩遇臣無任戴  
天荷聖激切屏營之至

進觀御書梵字詩謝降詔答諭表

賴音頌聖方憑于斐狂綸檢垂慈更加于褒獎觀文眩  
目拜賜兢心竊念臣仕籍叨榮儒林廢業游玷疑丞之  
地皆陪潤譯之場探內學以非優撫鈍根而永慨幸遇  
皇帝陛下欽揚祖烈丕護真乘因竺館之先規續貝書  
之妙蘊盛延開士深究旁行對翻華裔之音博采形聲  
之說法宮多暇書苑留神爰御寶趺親題梵畫仍冠篇  
而善敘且作刻以垂芳紺殿雄成祇園聳觀實審才之



攸縱顧佛劫以增遐而臣例屬齋薰獲窺摹矩不勝私  
幸竊綴短章仰煩夜石之程已積春冰之畏敢謂伏蒙  
陛下靡捐介善申寵近司枉深訓以發中廊大猷而與  
進戴恩嶽重徒極于將顛拂已毫輕未知夫為報姑銘  
獎拂用寘肝脾臣無任

謝詔赴闕表

使駟光華甫臨州部言綸溫密申錫詔函聞命震惶撫  
躬跼蹐臣某誠榮誠懼頓首頓首竊念臣嚮辭宰政出

布藩條專處外以首公顧還朝而絕望周旋三任首尾  
八年終微樹化之方可稱惟良之歎比者伏蒙皇帝陛  
下追憐舊物均賦羣材因內幄之缺員降輜軒而垂召  
仍緘帝札曲暢天慈諭發號之揚庭俾解藩而趨節孤  
臣何幸丕訓前頒未知讓爵之端先聳捐生之志感深  
成泣言拙無文方促駕以就途但望雲而翹首永言歸  
報倍萬常鈞臣無任

謝宣召入學士院表

祇聽褒音仰承睿選恩浮材限憂倍榮涯俯僂以還心  
顏罔措臣某誠榮誠懼頓首頓首竊以漢門金馬始基  
待詔之華唐署鑒坡緒創司言之祕預規中之訪逮極  
朝右之凝嚴聖世尚文豐規冠古慎谷碩彥增暢皇猷  
顧崇簡之有初奚下流之可冀如臣者斗筭均量舟劍  
懷愚偶自諸生幼親樸學天聖初元光華甫協幽側竝  
提遣會時來玷塵舉首自褫巾而補吏洎縶組以通閭  
番直史庭試煩財府寸長靡効曠度兼容弗誅畫餅之

名更備星垣之乏雖復奉行王訓判攝事經出入四幕  
網繆千慮終取伐檀之誥方期汰礫之逃敢謂伏蒙皇  
帝陛下式序衆勤俯收介善記甲科之前幸察孤進之  
無他召自綸闈齒于鼇禁矧典司至重號令惟幾慎方  
出之文義無反汗奉席前之對威不違顏自揣懦庸將  
焉報稱然當奉循正式載淪蒙襟希皮弁之守官免纏  
牽之貽累微生易隕洪覆難酬臣無任

河陽謝到任表

進朕省坐易撫侯封促駕啟行適臨治所選辰署事初  
布藩條祇荷獎甄不勝榮懼臣某誠感誠抃頓首頓首  
竊念臣一蒙策免三寵州遷祿有空餐官無最狀嚮屬  
盟津之缺守猥煩漢札之疏恩升秩夏卿增華使榮仍  
因便道特許過都朝推念舊之慈禮借儀台之重孤心  
易感危涕難收尋迫王程遽開郡閭此州據山河之會  
擁周晉之交列戍分城造舟濟險隄防甚設議遲為嚴  
雖曰近藩實名雄鎮然而累年饑旱比日沈災東有漕

渠開塞之煩北有計檄誅求之苦使多緣隙民罕聊生  
臣敢不畧去煩苛勤加緹輯庶臻還定少副憂勤俯循  
備禦之餘曷稱惟良之寄此蓋伏遇皇帝陛下俯矜忠  
橫本乏同游因竄服之與區進天臺之峻品曲加存遇  
終保衰遲身遠天高恩深語拙惟有涕泗尚冀感通臣  
無任戴天荷聖激切屏營之至

揚州謝到任表

淮海奧區圭符假守揚舲戒道止涉安流引絃視章即

頌聖詔舟輟一都之會夫家萬室之繁去國匪遙偃藩  
何幸臣某誠榮誠懼頓首頓首伏念臣稟姿蒙拙陶化  
亨嘉始擢草茅寔階纓綬斗筭量淺丞史願微常蹈道  
以自安敢越思而希進猥由文館入忝詞垣俄自禁局  
召參台府比際清衷素定靡復類能羣議雖諠罔容收  
渙因懷自勵訖稱大恩而淺謀不足以計深慮妄思  
夫效智叛羌負德遄上宿兵亟會宰司參圖戎索廟堂  
集論或率已而妄言帷幄定謀卒因人而免悔曾微寸

效可益萬分至于進策治朝數言庶位纖悉咸資于睿  
斷周旋莫企于清光備位踰年妨賢積日雖官箴挈矩  
僅守匹夫之廉而公路須才安稱明君之蓄加以愆冥  
自稟濫落少機言或漏于屬垣疑多成于納履積為怨  
咎仰玷和平矧當責實之辰宜被黜幽之典伏遇皇帝  
陛下兼容如地載照為春盡赦多尤止停貳職仍七人  
之舊列總千騎于大邦假以便安紓其惴慄顧微生之  
再造濱十死以何辭謹當斂分思愆首公營職因楚人



之既教濟漢令之在寬乘乃化孚期于政辨然念操心  
易感實本于孤臣求舊與歸更依于仁后視風波而累  
息縈絲路以迷魂臨啟怔忡心隨涕隕臣無任

鄆州謝到任表

西清祕秩式寵儒林東夏輿區更均邦翰參為異數猥  
集孤臣祇荷甄收舉增惶震

中謝

竊念臣斗筭近器章

布諸生興于羈旅之餘玷厥殊科之選嚮階華劇進預  
疑丞遭百度之交修乏寸長而上報久蒙君養曷逃尸

素之慙終不汝疵寢累含容之德逮從外補方涉再暮  
前忝未酬來譏已積敢謂伏蒙皇帝陛下曲全邦體申  
獎官成枉漢札之深辭易汶田之巨鎮冠升殿職寵映  
藩條仍加別使之名兼撫連城之重矧惟州部匪遠寰  
畿津陸交途農商宿業封巒在望澤多膏寸之滋鳴蹕  
如聞野有儲胥之舊茲焉寄任允屬循良退念散材曷  
勝優委敢不率循丕憲上體至慈竭獄市之煩文濟詩  
書之美俗庶幾安輯少副憂勤自餘頂踵之微或効涓

埃之報辭殫語拙感激何云

進國陽大報頌表

臣伏以日在太初之歷是謂履長天隨帝者之居茲焉  
臨饗北三垓而昭事坐兩觀以均禧徧朝真馭之下都  
翕受羣元之厚福含生鼓舞協氣陶烝忝蹈德以泳仁  
宜交中而發外中謝竊念臣單門下品弱植淺中被至  
化之純深副大猷之餘緒翹然在止厠君子之育材間  
或登高乏大夫之能賦屬承平之嗣旦講容典以和神

南北異正而竝修祖宗以侑而交獻周游六氣乘之而  
健行盼蟹萬靈眉然而著感目美光之若畫欽衆瑞以  
如山矧當清道之辰已預皇軒之引瞻威咫尺稟訓壇  
蜎慶千載以親逢暢四支而內忝幸聯儒館難默頌聲  
慙積日以庀詞邈談天而幾殆僅成累句式贊盛容均  
子夏之一詞曷案原缺一字邦體本虞初之小說敢預家流  
仰瀆程觀彌增震覬謹夙夜齋戒撰成國陽大報頌一  
篇隨表上進以聞干浼宸扆臣無任

傳法院乞降御集編入經藏表

臣聞帝藻垂鴻本春山之秘蘊金言輯教極龍藏之寶  
嚴迹夫翰墨之傳均乎天壤之永矧當盛際抑有豐規  
敢露虔衷仰資外護臣等誠惶誠懼頓首頓首恭惟皇  
帝陛下道包睿哲化格清寧總民極以無頗陶天倪而  
不宰多能攸縱衆善咸甄眷佛譯之清場本神宗之妙  
刹香壇貝牒慎宣使範之雄綈帙牙籤對比儒林之盛  
克延慧命參固不圖然念永熙以上聖之姿首數神教

真妙以至仁之度並闡慈源竝因機務之間恣探空有  
之理宸章審采法語仙音率賜助于禪詮已冠升于釋  
部陛下紹隆先志宏暢宗風每緣聖作之華備獎真乘  
之奧人天抒歎象緯交輝縣涉歲時宸盈策牘未序寶  
題之次曷聳沙界之聞臣等叨服宰司兼榮法館悵鈍  
根而懵學依洪覆以知仁願續前徽俾資善述欲望聖  
慈許以自來御製應千釋宗文字降賜傳法院令繹經  
三藏試光祿卿沙門惟淨等依例編綴竝入經藏目錄

庶茲總括庸或發揮茂彰奕世之能高映羣篇之首且  
孚大覺永庇含生饒益之多名言曷喻干冒宸扆臣等  
無任

謝加職移知鄆州表

輕軫將命祕殿參華易守東藩治行便道寵章繁集媿  
汗交流臣某誠榮誠懼頓首頓首竊念臣世系卑平天  
姿淺固親邁尚文之會首叨擢秀之科因士易農緣名  
責實褫巾未久通籍為榮乘善養于羣材預徧階于顯

列曾微風績遂亞疑丞齟齬備員兢兢履薄物勝權而  
衡殆形過鑑而照窮理有固然道無不蹟果煩賜罷方  
厭騰譏尚蒙藏疾之仁尋假出麾之寵奄綏淮服坐服  
漢條省咎窮年酬恩靡日比者伏蒙皇帝陛下哀憐舊  
物收拭深疵念器使之嘗加忍生成而遂棄曲回天造  
申穆朝猷序聯清禁之崇再委名城之寄仍銜使節參  
重川符悅祇命以驚魂徒拜嘉而隕涕桑榆收效已辱  
于垂矜頂踵捐生未知夫上報臣見依準勅命取便路



發赴本任無任瞻仰

代楊鄆州謝上表

臣某言蒙恩授臣知鄆州軍州兼管內勸農事即于今  
月日到任上訖謬分左契臨長東人提千騎之雍容有  
六條之森備出麾有幸坐閣增榮

中謝

竊念臣箕斗虛

名丘園微介決科僅中論績稍遷邁明辟之纂圖忝望  
郎而升秩用惟枯木不自先容細及秋毫罔非帝力但  
罄如絲之亮曷知蠲竈之求懇賴洪慈免其大戾甫周

一閨更典三藩銜塞藪以見容員支離而竊祿昨緣便  
道遂獲造朝許留數刻之間俾典百斤之奏俄煩節召  
改賜袍紳追露冕之為榮均解衣而拜賜胡然頑陋縻  
爾寵光斯蓋伏遇皇帝陛下通駿先猷函蒙庶品謂夫  
俎豆之無越矜其丹牖之可塗曾不疵瑕猥從器使伏  
況汶陽疏壤魯道遺黎昏作屢豐敦龐俾乂雖屬河工  
之近決不妨田畯之有秋惟冀至仁少寬中良臣敢不  
內循丕訓上體寶慈列三壤之埴壚勤修稼政愛二東

之杼柚底慎邦財儻臻樂職之風冀贖浮人之刺臣無  
任云云

謝轉給事中表

郵傳疾馳贊書申錫改東臺之祕秩仍左竹之善蒲思  
數並隆心顏罔措臣某

中謝

竊念臣本惟弱植素懵遠

猷一玷文科游膺朝選攝官承乏率非才舉之宜舍垢  
匿瑕陰荷天私之惠獲徧階于華近固無補于涓毫至  
乃超備諫員參聞宰政當求治責成之會有先機斷論

之煩力勉徒勤道悠自蹟辱收還于重任始厭伏于煩  
言繼荷宸慈曲存邦體旋易麾于巨鎮復帖職于清廟  
追貸前尤叢臻謬寵謝生無所履薄增憂不謂更枉公  
僉平稽歲伐例舉當遷之典兼紆即賞之褒循踐殊資  
俾光外寄此蓋伏遇皇帝陛下深憐舊物均飾庶工因  
虞篇陟考之文用漢守增留之制併推優渥昭示保全  
內省微軀曷勝鴻施謹當勤思寡悔益服攸箴承化樹  
風或萬分而有取竭忠酬貺期十死以知歸感極于中

辭殫靡喻

謝賜撫問表

使駟馳星天辭出紆辱宸心之念舊因頒式以推慈恩  
厚忘言感深成泣臣某誠榮誠感頓首頓首竊念臣本  
由寒士早玷榮班出入近司周旋二紀石心許國固無  
可轉之期川謗盈朝容致他來之吝逮違樞握洊易侯  
藩席槐府之崇聯惕將壇之重寄敢謂皇帝陛下堯仁  
無外漢度兼容謂體貌之賞加眷忠愚而可憫爰馳華

壯俾道溫言并煥惟珍特分于貢品寶匱有爛紛照于私閤仰聆金玉之音俾極君臣之分孤生內省隆惠奚酬但歸誓于靡捐或謝生于覆育

中書謝傳宣表

臣等伏奉入內都知張永和傳宣中書密院重脩開先殿成迎奉太祖皇帝御容往彼供養所貴四時薦享得伸誠意與卿等中外同慶者實宇雄成神儀載貯屬奉迎之伊始枉傳訓之發中睿德所覃羣心交抃恭惟皇

帝陛下紹熙景命勤述先規曩緣作繪之容參對不祧  
之禮炳然威御臨厥孫謀因佛刹之增新命工師而度  
構再嚴秘殿將宅皇靈兼別廟之宏模超化城之絕境  
羽旄先導異止漢冠之游都邑叢瞻寶聳軒臺之畏孝  
誠克盡前烈彌昭臣等忝服近司首聆慈誨空極親逢  
之幸初無云補之方惟誓協恭或酬洪覆

賀冊封究國公主表

宮闈延慶國邑疏封誕告有初均歡無外臣某誠欣誠

抃頓首頓首伏以充國公主天孫稟粹巽女流占在姆  
不勤承親允穆恭惟皇帝陛下至仁敷祐篤愛成雍誕  
生穠矣之姿前導百斯之福教宮有典擇配惟嘉爰選  
良辰茂宣華冊肇禹州而啓國築魯館以由章典物備  
臻官司載躍矧于歸夫舅族諒深沐于皇慈臣早忝近  
班今司外服徒聆發號莫獲觀光瞻望宸廷臣無任

再入參乞罷免重任表

臣聞梗短而使汲淵非浸灌之巧馬窮而後易駕非馳



馭之宜物理苟然人情可喻是以明主臨下孤臣事君  
弗強所能乃輯宿官之業自涯其分方逃不職之誅敢  
傍斯言用敷至懇臣某

中謝

竊念臣天畀疎拙地出羈

單偶緣挾冊之勤誤中掄材之首束紳仕路佔畢文林  
遭山藪之兼容備閨臺之旅進自爾朝多過聽官匪序  
遷驟塵星掖之華采入鑾坡之祕固無寸效可稱明恩  
更因承乏之辰猥玷參機之重前叨未補來忝益滋過  
中之器易盈責實之名難副果煩罷免終賜保全歷典

川符五新年簫何意君環之召復聯公衮之榮顛枿再  
條朽肌還肉雖聞弦戢翼悖魄未安而內手捫心丹誠  
故在輒復夜思晝過今計昨非期一得于陋愚或少裨  
于顧訪其如性資有限機務至叢卜式樸忠初無趣和  
倪寬懦武紫原本  
缺三字明而又睿德日躋聖猷天建按循先  
烈裁定懿綱求百辟之諫言責三公之吏事諒非雋輔  
疇克同寅竊顧妄庸將焉報稱宜從重劾以警空餐然  
念竭智以進思介一心而自守偶逃多悔幸及三年稽

大比之文敢煩陟狀撫不肖之質尤合避賢輒循考績  
之期仰丐退身之幸伏望體天法道欽文聰武聖神孝  
德皇帝陛下廓包荒之度推養士之慈業已與成則無  
令亟敗事容善始則當俾有終許辭貳政之繁卻服從臣  
之末職勞有底量力自安亦冀穆穆公言潛弭曠官  
之誚諄諄末路免罹不哀之灾意迫言蕪期于得請干  
冒宸宸

乞致仕表

臣聞爵祿有次王者所以馭臣筋力已衰聖人不與為禮何則上隨材而賦任則壯者樂盡其節下度德而展體則老者止于不能授受由是得宜始終因而偕篤斯

為達道貫厥大倫愚衷所稽皇鑒攸覽臣某

中謝竊念

臣本興孤族素乏遠謀天聖初伏遇體天法道欽文聰武聖神孝德皇帝陛下始攬萬幾親臨多士軾怒蛙而待勇撫駿骨以求駒而臣適會時來遽躋才等猥緣士牒仰沐朝猷游陪華要之徒采入凝嚴之禁終因人乏

遂贊宰司辱體貌之兼隆竭涓埃而無取自茲典領並  
復崇高再參政務之繁正管兵機之劇一塵鼎鉉兩幹  
星樞形已過而照窮力猶求而駕敗屢招譏劾深累包  
容一昨罷帷幄之同寅丐州藩之出守理當策免思乃  
庭揚假使閫之旌旄帶輔臣之印綬質于公論實玷天  
私雖席寵之有因顧害盈而難追重念臣久塵榮路垂  
四十年福過成災氣衰得疾去歲中禍延同氣痛徹五  
情乘悲泣之過多駭營魂之不復幽憂攻內攝理垂方

接此頽齡漸成宿疹積寒棲于膝理流毒滙于肺經一喘之來百骸俱廢步趨多梗拜伏為艱若復貪極品之崇名懷千鍾之厚廩鬼誅將作人言謂何況臣今茲行年六十有七常恐一旦先犬馬填溝壑終無以報恩塞責臣不勝私願願上還官職之事乞骸骨將孥息歸田里避賢者路七十致政抑惟常典臣年雖未及病則有餘幸丐餘生貪延聖日儻孤誠之獲遂畢九殞以知歸敢望聖慈特除臣一致仕官因便尋醫以救殘喘干冒

宸扆臣無任

乞致仕表

言而無隱情至者得以抒陳瀆則有誅德厚者謂之含  
覆批章繼錫俞訓未頒輒復叩聞覬詣就第臣某誠惶  
誠恐頓首頓首竊念臣顓蒙自信憂畏早衰近司五玷  
于朝咨巨屏七更于郡寄空勤夙夜蔑著毫分讒謗居  
多寵光翻渥雖虎符劇任祿秩甚優而鶴髮暮齡筋骸  
難勉矧復因寒捐肺緣咳成氣拜伏稍頻喘啗僅續訪

醫寡效却粒無方操藥七以自憐擁食枯而太息生涯  
若此人事奚言屢達封囊願還駢組辱中宸之念舊未  
聽角巾陪四輔以造朝衆嗤蹇步如伏蒲之有劾顧握  
節以何顏伏望皇帝陛下昭示至公曲推洪施遂臣知  
止式保于有終揆臣所堪無強其不逮得從初志實緩  
深尤虔僉音始安累息欲望聖慈許依臣累上章表  
特除致仕臣無任祈天俟命

再乞致仕表



筆端言拙悃悃難敷詔底恩隆都俞尚閎輒緣洪造更  
露微衷臣某誠惶誠恐頓首頓首伏念臣草茅地寒樗  
櫟材散曩因薄技來會亨辰列仕版者再閏八周佐國  
論者五遷三已每塵眷獎遂極崇高風績茂升年華滋  
晚頃希止足姑解組于鄴城比邱蹢躅復假麾于譙壤  
覩顏冒祿力疾長人惟知謹守常規郡閣靡頒條之最  
不能導迎善氣農疇罹澤水之灾加以淮北荒殘渦陽  
沮洳蕭然南畝悉變于橫流蕞爾孤城不沈者數版眷

言守土尤藉長才而臣適在暮齡猥當優寄敢卧尸于重祿空勉率于孱軀因此震驚轉成羸繭而況任崇將鉞秩視公槐固當參寵勲賢詎可久私瘞瘵伏望皇帝陛下大明委照廣覆推慈矜齒髮之早衰憫筋骸之難強俾從閒秩允謂生成矧在先朝已陳納祿連逢聖日遽此延恩出入三年倦勤十上昔祈退老固懇懇于朝端今若因循必取嗤于天下非獨失臣子進退之節抑亦玷衣冠廉讓之風傾藹馳誠叫閤佇可伏乞檢會前

奏特除臣一致仕官放歸田里

乞罷樞相表

臣聞器小易盈者難持任重將顛者思止儻奉承之有失即隕越之可虞敢援至言冒陳丹蘊臣某

中謝竊念

臣早由謹樸參備丞疑出入踐揚二十餘載食浮日積官謗愈誼而自再冠洪樞漸逼衰景徒竭短慮終誤遠圖故經制邊陲或蠻蜚內侮按列軍伍或戍卒未充上資聖謨並稟成算至於稍嚴賞格則羣煦漂山暫塞倖

門則衆怨成府孤特少助怯懦自知敢竊天工久妨賢  
路伏望皇帝陛下許還重柄垂丐殘骸得寬典刑庶保  
要領儻未令便歸田里或且許近守藩州補報之心內  
外惟一投誠至切得請為期

乞罷相表

臣聞名本戒乎多取過實則凶力所貴乎自量弗能當  
止矧萬幾密勿任切于論思一介婆娑力窮于報稱所  
宜自劾以警空餐仰賴至仁罄敷危訴臣某誠惶誠懼

頓首頓首竊念臣學非全古才不逮人擢始布衣進陪  
書笏寶元中因緣人之參預政機試可罔功踰年賜免  
已更之駕奚望于復轡方汲之淵何圖于續綬自再塵  
于國論俄六改于歲陰齟齬備員容容取誚其間改使  
樞管序正宰司光華所叢位望彌峻然屬邊烽罷警調  
輶息勤列辟交脩日新于所治當宁親務天健而愈強  
因用具臣久忝高位至夫講求隆典崇報上神因大寢  
之宏規復九筵之盛祀克成鉅禮莫匪聖謀既絕望于

清光亦異資於彼相逮均慶寵首及庸虛讓爵無階履  
高增慄重以福基素狹年事日侵有負乘之近憂之將  
明之遠業雖主恩含垢外弭于人言而天道害盈難逃  
于鬼瞰一歲之內二息云忘昧聖哲忘情之高深朋友  
離羣之痛氣衰耳塞淚熱目昏寂聽則妖鼓亂聰審視  
則黑花盈睫居多忘誤動輒震驚悲憂一來志慮俱耗  
安可尚聯宸職之貴分揖槐庭之嚴身不自聊政于何  
有且三公之責吏事任靡容私聖主之督愚臣悔將累

國內循非據實玷具瞻伏望皇帝陛下念稟數之早奇  
憫匪才之難強許還重柄出補外藩愛小器于未盈免  
其必覆貸槁骸于將隕俾遂更生進退之方恩義偕允  
投誠無隱頃可為期臣無任祈天俟命

元憲集卷十九



欽定四庫全書

元憲集卷二十

宋 庠 撰

外制

中書試御史大夫除右僕射制

敕古者因右武之官尊主射之號始寓天秩以邦昭儀  
惟左右于中臺實師長于庶職諒非肅哲之劄曷允僉  
謀之同疇庸匪私惟德之舉具官某莊重不倚寬博有

謀自覽德以逢辰亞舒文而華國寢懋忠力協宣朝猷  
訪之以善而椒蘭並熏嬰之以煩而銑刃不頓實有明  
效暴于羣倫曷者付以憲綱寄之邦直而能山立盛氣  
條舉舊章櫛權豪之匪彛曷官師而交輔宜示殊典進  
服大僚噫總六官之卿納百揆之路治本之自出官成  
之所得為時羽儀任政梁棟副我則哲之效繄乃司寅  
之忠往踐厥司無忝休命可

降授太常博士知臨江軍龐籍可尚書祠部員外

郎福建路轉運使制

勅具官龐籍傳曰舉直錯諸枉又曰觀過而知仁蓋所以判忠邪而貸苛細也以爾比用局力參于風憲露章抗論多所澄糾而能陰辨度惡斥言壬人暴于公朝卒得姦狀乃以鉤據之微累訊證之弗讐姑從常科俾降元秩今閩部遐曠漕舟湏才宜復郎曹之華兼還使節之重體我甄叙無忘夙宵可

皇弟鄭州防禦使允良因鄭州升為泰寧軍可移

別州防禦使制

敕具官允良藉慶廟靈參華宗邸夙陶善教寢服榮班  
擢擇壤于陪京俾建侯而禦侮屬茲要郡介我二都特  
表中軍之雄且壯近郊之守高牙作鎮既易故名列榮  
制藩宜更新部淮西奧密楚北柔疆命秩均封以屏王  
室可

衛州團練使充邠寧環慶州路駐泊兵馬部署兼  
知邠州曹琮可防禦使充秦鳳路部署制

敕唐制刺史兼使以禦過差重國朝邊屯特將以攝署  
為雄參付寵權是屬公舉以爾具官曹琮性韻沈懿風  
略雋明地席忠勲之餘才更煩瘁之使向資親信外職  
訓齊仍總郡條且濟戎索而能威惠克舉疆場以寧眷  
乃岐山之區奄于天水之會兵籍尤衆師律猷嚴宜疇  
已試之勞往司善帥之任當念恩寄方越常均無懈克  
誠以累先服可

故左龍武官大將軍昭州防禦使張昭遠可贈觀

察使制

敕夫勞臣竭節雖沒而靡渝王者念功既往而彌篤所以合恩義之紀貫哀榮之終貢厥英雄我有成名具官張昭遠才謀沈鷺姿度方嚴練韜畧之大端席公侯而茂閥早由差擇遂服驅馳洊升諸使之聯亟攝專城之守通知疆事兼濟吏文展于體以實勤勵乃猷而克壯此階勇爵用領禁屯方出倚于幹名遽歸移于末疾頃亦換司環衛仍護州兵庶臻勿藥之和奄軫聞聲之痛

永言遺烈深悼予懷法賻如儀廉車正秩茲為寵卹尚  
克歆承可

故耀州觀察使曹儀可贈節度使制

夫勤官盡瘁者忠之全哀亡勸存者義之篤矧爾帶礪  
之胄方備封疆之臣務罄一心靡嗇他用奄邁淪謝宜  
錫寵褒具官曹儀性資端和世載勲烈在昔乃祖以德  
冠羣后從享於太宮施及而考以力宣王家繼仗于齋  
鉞負荷宏構屬于幹材自階仕于班聯實積效于勞勤

遂繇別使入掌禁屯兼倚列城出固西圍比嘉控遏之  
重改升廉察之權式佇後庸克纂先服美志未遂脩塗  
已窮戚自計聞實累中惻俾正登壇之秩尚識傳弓之  
謀歸購納書爾或無限可

東上閣門使梧州刺史魏昭昭東上閣門使運州  
刺史王克明並可四方館使制

敕具官王克明等夫史局有聯館賓為重列于禁籍用  
寵邇臣非勲緒之可圖顧思典之疇稱以爾等並生冠



族均賦美材早服在庭之班多更守局之職曩嘉勤効  
洊職官榮序位天閭假節州部然克明曩緣外補頻復  
尚稽而昭晒雖屬近遷公言猶鬱俾偕升于近紹且無  
格于常科勉勵恪恭滋稱恩紀可

衣庫副使知廣信軍王果可尚食副使制

敕具官王果頃自朝紳改乘使轍仍委備邊之寄甫更  
成歲之勞屬是軍牙對遷符守義當便道思有進階俾  
升膳局之榮且壯和門之氣勉脩疆事毋忝寵章可

故內殿承制魏成德可追復供備庫副使制

敕具官魏成德早基華胄列內朝奉使指以實勤  
更歲期而亦久向緣微坐遂免所居方踐復圭之辭遽  
迫藏舟之變奄然不淑良用軫懷宜追寵于故官俾終  
榮于厚窆甄勞念往尚或嘉茲可

右贊善大夫丁禹可諸司副使制

敕具官丁禹優學儒家策名官簿才蒞煩而畢給志越  
俗而不流向積吏勤遂膺州寄而能樹風遐徼歸課攸

司敘陟宮坊之聯甫引朝闈之籍而夙懷感慨願奉驅  
馳列牘自陳徇忠彌切嘉乃兼材之美俾參貳使之華  
勉樹壯猷以基勇爵可

如京副使永定陵副使張懷則莊宅副使制

敷具官張懷則以肅給之姿列禁嚴之侍游更歲次階  
陟使名比嘉軒闥之勞出總山園之衛恭懷先寢近在  
神畿雖百靈護野而有嚴顧七遷成邑而增重疇其謹  
職宜用推恩進厥華聯仍茲舊領益圖祗恪副我欽崇

可

深州防禦使駙馬都尉錢景臻男忱可莊宅副使

制

敕某公爵吾所重而內使之介以為初命豈惟爾婉孌  
是厚實我諸姑之慶也制名賦祿以進成人勉就學能  
以需官使可

新差知貴州東染院使榮州刺史馮伸已可洛苑  
使制

敷桂林守印必寄材良洛城苑監是光使號以爾具官  
馮伸已相門餘慶世祿舊勞洊服榮班果敷休譽或承  
輶將命或握節護邊寢兼刺部之雄且啓封侯之業屬  
吾退郡茲擇幹臣公論攸先寵章宜渥俾進內司之列  
往撫南荒之會靡忘臨遣用對褒華可

故左班殿直楊成可贈崇儀副使制

勅具官楊成夙以幹名備于煩使序服庭臣之列洊書  
官簿之勞美尚方申脩塗早已克鍾懿烈可慶高閼矧

盡瘁之未圖顧追榮而有典內司置使貳職參華超爾  
寵名以光幽夢可

資政殿大學士刑部尚書李迥降授太常卿知密  
州制

殿言之多誣實惟殄行過弗圖改茲謂遂非矧三事之  
舊臣均一德于同體表式攸寄中外所瞻苟自蹟于匪  
彛因難枉于明罰以爾具官李迥曩繇才等出應時須  
遭會先期參管魁柄逮余儲邸之日亦預宮僚之榮中

罹間言越在外服朕矜其介節申乃昔恩擢自為藩付  
以當國而忠款靡效朋比屢彰雖榮罷于宰司猶階進  
于天秩洊加清職留冠邇聯冀省疚以自新乃構忿而  
深詆洎從薄責咸失事端噫進既負幹棟責成之求退  
又乖宗工勵俗之德謬戾若此良用憮然跡其矯妄之  
來宜正典刑之黜尚緣哀請弗忍深懲特降序于禮卿  
且出備于藩守爾其內訟厥咎深體至慈念屈法之惟  
艱顧蒙宥而難再虔佩成訓以復令名可

龍圖閣學士給事中知兗州范諷可責授武昌軍節度行軍司馬不答署本州公事制

敕名不假人所以敦乎治體法無阿近所以去乎官邪苟治行之有虧非彛憲之攸貸以爾具官范諷出于世緒涉乃藝文存紆朝紱之華驟任諫言之責比嘉抗論亟用推恩歲厯未深寵靈彌渥而不能罄輸亮節祇報殊私隱計簿之書章濫公朝之賞典乃復咨于州部冒市田廬陰答利交公形薦牘方自陳于罄竊曾不愧于



心顏逮窮置對之辭盡露懷姦之態未足決獄仍擅之  
官繫傲蔑之罔悛顧刑章而何追特從幽黜以肅朋邪  
俾典午于方州且省愆于散地爾惟取悔余匪棄人可  
京東路同提點刑獄內殿承制閤門祇候王繼祖  
可禮賓副使制

敕具官王繼祖班籍幹材官藩遺緒久備閤司之使浸  
承殿制之嚴羈被朝章分廉郡獄赤車所屆幽犴無寃  
曾是稽勞當茲滿歲宜遷使範之亞尚虔刑典之中益

整勵精無忝褒擢可

西上閤門使梧州刺史魏照炳可東上閤門使制  
敕九閤之嚴二閤為重實謹門籍用冠使名且寵東西  
之聯俾詳功次之授以爾具官魏昭炳資性沈愿風矩  
間華席慶公臺之餘累勞軒陞之職奉承官訓階序禁  
朝自酬績于事經早兼榮于使部曷資勤力參典盛容  
歲厯洊周莊恭彌劭宜進左扉之局益重適臣之班當  
體茂恩勉服來譽可

左武衛大將軍遙郡刺史王堯明可東上閤門使制  
敕滌瑕念勞人材所以無棄循階序位官秩所以有班  
矧于公朝莫非明勸以爾具官王克明地蔭華舊風規  
韶遠憑藉榮任周歷禁聯曩緣外家之親超升諸使之  
重入掌賓館遙指郡麾自矢遠嫌之防遂從易地之謹  
出監州牧歸列衛屯彌遠歲時屬沛恩號念甄收之有  
典固拂拭以為宜俾序要司且繇上閤勉懷退補用對  
亨嘉可

戶部尚書夏竦除三司使制

敕周以冢宰制邦用漢以列侯主計書而皆內權重輕

外濟調度哀征慎賦

案哀音催齊語相地而哀征則氏不移原本作襄征今據改

操

本建中合為使名我有才舉以爾具官夏竦文敏莊重  
淹曠清明自振褐昌期漸磐臚仕有精微之學以導化  
源有典誥之辭以華王體早符朝野之望迭處鈞衡之  
司清規所存嗣政攸庇羈雖倚垣翰之劇寄居留之雄  
歲紀存更朝猷增竚天臺正秩已穆于僉前地卿領務

宜歸于職業兼增食采尚重官儀罔憚使煩體我圖舊  
可

戶部郎中直史館知滄州郭申錫可三司鹽鐵使  
制

煮海為鹽鑄山為金不賦于田不征于關市而國用饒  
此山海所以為天地之藏而古者暴威武擒兇醜舉是  
而資之也其職屬於司會府必得其佐謹其筭而收之  
則無遺利矣具官某資性純敏不以私污義居朝亡朋

騫然自立已嘗試于司會府而以累去職今還汝以鹽鐵厥惟舊哉奏刀既熟奚煩朕之為訓可

三司副使制

司計之廢置歷世莫能定至真宗皇帝時析而為三于是事有條功有緒交處而不可雜並行而不可亂閱之百世朕知其不可易也然常得才用通敏之臣處之則法行而政舉副介缺丞相以爾等明厲有守嘗試外計府帑充實士馬宿飽可以貳吾大司農之治豈惟丞相

之言哉此正朕之所欲求也置爾其孰為過哉可

新除三司戶部副使尚書工部郎中陳瑛可三司

度支副使制

敕夫金布刊令地壤制征雖輸入有常而均節為重故  
支度參號總務在中副介承業擇人斯授以爾具官陳  
瑛志用精一材局敏通筮仕本于學優修方濟乎儒飾  
曩采朝論升補憲僚旋試治財之煩繼將護漕之劇莫  
匪最狀達于余聞邇以圖旌使勞貳領民版成命甫出

聯有序遷位無相踰任必差進改司移用之要且究析  
毫之能勉調盈虛罔或掎克可

三司度支副使尚書工部郎中陳琰可三司鹽鐵  
副使三司戶部副使尚書工部郎中司馬池可三  
司支副司制

敕故事邦計分部設使介以經其業雖職任均重而班  
著有次因勞序升實本其次以爾具官陳琰性理純壹  
靖而能幹以爾具官司馬池器職詳允和而不流並飾



文來仕展體首公簪筆握蘭分契將漕休有嘉績稔厥  
外朝頃偕命于使煩同胥協以陳力屬乃比局疇以外  
遷俾按循階之常且資奏刀之熟正郎舊秩會府劇曹  
各懋爾官以稱恩典可

尚書戶部員外郎兼侍待史知雜事姚仲孫可三  
司戶部副使制

敕國版制征民部置使必擇才彥參主計文列為副介  
之雄寶兼授受之選以爾具官姚仲孫踐修士檢肅給

吏資早階王髦遂置朝紱擢疇邦直之譽且責諫言之  
良忠規可甄輿論彌洽移總臺屬亦既歲時誠存不流  
文克無害而左戶缺職通籍類能差序宿官之勤允膺  
遷秩之次往蒞財筭深究事經勿弛勿苛尚質最要可

尚書工部郎中兼侍御史知雜事司馬池可三司

戶部副使制

敕國家底慎邦財兼崇使範以主計之重訂于列侯因  
制用之副均于小宰非有幹用疇允恪居以爾具官司

馬池行淳而方識簡而固繇鄉俊以來仕積吏閥而登  
朝符剡州符遠將歲漕比嘉守土之最茂贊操籌之煩  
朕察其冲恬考以名實正即位俾亞憲綱時序甫移  
品式方屬而戶版缺任庭著擇材雖糾劾未盡其能且  
甄升適在其次特回簪筆之選用經籠貨之宜往竭乃  
誠無忝榮遇可

除名人董仲言可團練副使制

敕具官董仲言曩服朝紳倅顏邊郡罔敦飭簋之操自

卷二十  
除籍之事比荷貸恩序升散秩裡禧載洽適注尚存  
宜即輔褰之封且升團結之筵兼榮視品仍俾定居姑  
務省循以報存錄可

太常寺太祝王靖可大理評事制

敕具官王靖世籍慶餘仕階蔭格參名邦祝祇事卿曹  
大比方周稍遷有典宜升理讞之局兼寵臺華之緒可  
太常寺太祝監西京麴院魯有立可大理評事制  
敕具官魯有立爰以妙年陶于善教建延世賞克服官

箴比由祝策之資往幹酒材之局屬茲稽課協乃懋恩  
握贊詳刑尚領煩蒞可

太常寺太祝監江州廣寧監馬璵可大理評事制  
敕具官馬璵卿屬之華邦祝為最鄉試煩于外局實通  
質于舊勞齋狀以聞滿歲當陟改司刑獄姑續事程曷  
哉首公往荷榮典可

太常寺奉禮郎梅輔臣可大理評事制

敕具官梅輔臣陶訓清門序階榮籍頗從吏補休有歲

勞覈狀甚詳升秩惟允宜黜杞絕之屬往參聽棘之評  
恪服攸箴尚續來課可

胡仲衡呂友直並除大理評事制

敕具官某等日者屢肆大旨囹圄空虛理官具員而已  
然而擇人以詳刑則不可不謹若爾某者皆由此選也  
宜及閒暇益務明習以稱朕哀矜庶獄之意可

元憲集卷二十